



**Jajačkim srednjoškolcima uručeno priznanje
„Max van der Stoel“**

E-matičar - nova elektronska usluga

**Svečanom sjednicom OV Zajce obilježen
Dan državnosti BiH**

JAJČKIM SREDNJOŠKOLCIMA URUČENO PRESTIŽNO MEĐUNARODNO PRIZNANJE „MAX VAN DER STOEL“



Jajačkim srednjoškolcima u Hagu uručeno prestižno međunarodno priznanje „Max van der Stoel“ za 2018. godinu koje dodjeljuje Ministarstvo vanjskih poslova Holandije u saradnji s visokim komesarom OSCE-a za pitanja nacionalnih manjina kao priznanje izvanrednih postignuća s ciljem promovisanja integracije i društvene kohezije. Nagradu „Max van der Stoel“ je 2001. godine uspostavilo Ministarstvo vanjskih poslova Holandije u čast holandskog državnika i prvog vi-

sokog komesara za nacionalne manjine Maxa van der Stoela. Od tada se nagrada dodjeljuje svake druge godine pojedincima, neformalnim grupama ili ustanovama kao priznanje za izuzetna dostignuća u promociji integracije i kohezije društva na području država OSCE-a.

Prepoznajući istrajnost i moralni poduhvat hrabrih jajačkih učenika za kvalitetnijim obrazovanjem, Međunarodni žiri za nagradu „Max van der Stoel“ donio je jednoglasnu odluku da nagradu „Max van der Stoel“ za 2018. godinu dodijeli srednjoškolcima iz Jajca na osnovu njihove „izuzetne smjelosti i poticajnog aktivizma koji je doveo do sprječavanja daljnje podjele u školama u Jajcu.

Nagradu Jajačkim srednjoškolcima 9. novembra 2018. godine, u Palati mira, u Hagu, uručili su visoki komesar OSCE-a za nacionalne manjine (HCNM) Lamberto Zannier i ministar vanjskih poslova Holandije Stef Blok.

Dodijeli su prisustvovali učenici iz Jajca: Ajla Vrebac, Azra Keljalić, Nikolas Rimac i Tarik Šehić predvođeni profesoricama Josipom Bogić i Amelom Kavazbašić. Svečanoj ceremoniji prisustvovao je i omladinski aktivista Samir Beharić.

Nagrada „Max van der Stoel“ sa sobom nosi i novčanu nagradu u iznosu od 50.000 EUR-a koju će srednjoškolci utrošiti na nove ideje učenika.

Na svečanoj dodjeli nagrade atmosferu je dodatno uveličala izvedba kompozicije “S one strane Plive” u interpretaciji Mostar sevdah reunion.

Jajački srednjoškolci su ostvarili izuzetne rezultate na očuvanju i unapređenju općedruštvenih vrijednosti u borbi protiv segregacije i podjela u srednjim školama. Oni su svjetli primjer grada Jajca za očuvanje suživota, tolerancije i uvažavanja i pokazali su ogromnu moralnu hrabrost, te bez obzira na sve prepreke, insistirali su da svoje obrazovanje nastave zajedno.

E-MATIČAR - NOVA ELEKTRONSKA USLUGA



Općina Jajce je sa ciljem olakšavanja građanima da dođu do svojih dokumenata kreirala mogućnost elektronskog podnošenja zahtjeva i dobijanja traženih uvjerenja i izvoda iz matičnih knjiga na kućnu adresu. Na ovaj korak Općina Jajce se odlučila najvećim dijelom zbog svojih građana koji žive i rade izvan granica naše zemlje. Također, na ovaj način olakšano je dobijanje uvjerenja i izvoda iz matičnih knjiga i za Jajčane i sve one rođene u Jajcu koji žive na prostoru BiH.

E-MATIČAR je kreiran u okviru projekta “Dijaspora za razvoj” Ministarstva za ljudska prava i izbjeglice BiH i Vlade Švicarske, u partnerstvu sa UNDP BiH i IOM BiH.

Klikom na ikonicu Aa na naslovnici otvara vam se uputstvo i elektronski zahtjev. Isto možete preuzeti i na linku <http://www.opcina-jajce.ba/maticni-ured.html>

NAMJENSKA KREDITNA LINIJA ZA POMOĆ GRAĐANIMA ZA PRVO STAMBENO ZBRINJAVANJE

Općina Jajce i UniCredit Bank potpisali su ugovor o formiranju namjenske kreditne linije za pomoć građanima za prvo stambeno zbrinjavanje na području općine Jajce u iznosu do 1 milion KM.

Kamatu po odobrenim kreditima korisnicima kredita subvencionira Općina Jajce u maksimalnom iznosu od 10.000 KM po odobrenom stambenom kreditu.

Kreditna sredstva mogu koristiti fizičke osobe s mjestom prebivališta na području općine Jajce za prvo stambeno zbrinjavanje (gradnja kuće ili kupovina kuće ili stana)

UniCredit Bank je, u skladu s potpisanim ugovorom o formiranju namjenske kreditne linije, objavila Javni poziv za dodjelu kredita.

OBILJEŽEN MEĐUNARODNI DAN TOLERANCIJE



Međunarodni dan tolerancije 16. novembar u Jajcu je obilježen zajedničkim aktivnostima Misije OSCE-a i Koalicija za borbu protiv mržnje iz Gornjeg Vakufa-Uskoplja, Viteza, Zavidovića, Zenice i Jajca. Međunarodni dan tolerancije je dan kada se podsjeća na to da je potrebno uvažavati tuđe mišljenje, osećanja i uvjerenja.

Tolerancija je poštovanje, prihvaćanje i uvažavanje bogatstva različitosti u svjetskim kulturama, forma izražavanja i

način da budemo ljudi - UNESCO-ova je definicija za toleranciju. Najsvjetliji primjer borbe mladih ljudi protiv mržnje i podjela su jajački srednjoškolci dobitnici prestižne međunarodne nagrade „Max van der Stoel“ za 2018. godinu.

Nakon sastanka, članovi Koalicija proveli su akciju podizanja svijesti građana o značaju zaštite okoliša i postavili korpe za otpatke na deset različitih lokacija u gradu.

Učesnici su također imali priliku upoznati se kulturno-historijsko naslijeđe Jajca sa ciljem promocije pozitivnih vrijednosti i tolerancije, te ukazivanja na važnost dijaloga i poštivanja različitosti.

Općina Jajce upućuje zahvalnost Misiji OSCE-a u BiH Terenskom uredu Travnik i nevladinim organizacijama članicama Koalicije za borbu protiv mržnje „Zajedno“ Jajce za sve aktivnosti koje provode u okviru ovog projekta.

Inače, Misija OSCE-a u Bosni i Hercegovini podržava 31 koaliciju za borbu protiv mržnje u obilježavanju Međunarodnog dana tolerancije kroz organiziranje različitih aktivnosti u devet lokalnih zajednica širom zemlje. Cilj ovih aktivnosti je promoviranje tolerancije i uzajamnog razumijevanja, te ukazivanje na važnost dijaloga i poštivanja različitosti.

Ove aktivnosti obuhvataju promovisanje tolerancije prema migrantima, kroz organizovanje kulturnih manifestacija i javnih rasprava u Velikoj Kladaši i Srebrenici, omladinski aktivizam i interakciju između mladih i organa vlasti u Brčkom, Prijedoru i Višegradu, te susrete organizovane u cilju upoznavanja građana sa kulturnim i historijskim naslijeđem Bosne i Hercegovine u Sarajevu, Teočaku, Trebinju i Jajcu.

SVEČANOM SJEDNICOM OPĆINSKOG VIJEĆA JAJCE OBILJEŽEN DAN DRŽAVNOSTI BIH



Polaganjem cvijeća na Spomen-fontanu u centru grada i svečanom sjednicom Općinskog vijeća Jajce u Jajcu je obilježen 25. Novembar, Dan državnosti Bosne i Hercegovine.

Svečanost obilježavanja počela je izložbom likovnih radova učenica i učenika osnovnih i srednjih škola pod nazivom „Tradicija moga kraja” u organizaciji KUD-a “Jajce” Jajce otvorenoj u Domu kulture, a nastavljeno prigodnim priredbama organiziranim u jajačkim školama.

Također, u Domu kulture Jajce upriličen je prigodan svečani program prožet recitalima učenika osnovnih i srednjih škola, a jajačkoj publici predstavio se bosanskohercegovački pijanist i glazbeni pedagog Bartolomej Stanković.

Ispred Spomen fontane u centru Jajca, uz zvuke Gradskog duhačkog orkestra/Limene glazbe Jajce, u znak sjećanja na sve osloboodioce, položeno cvijeće, nakon čega je uslijedila svečana sjednica Općinskog vijeća Jajce.

U prisustvu brojnih građana i zvanica, intoniranjem državne himne i uz pjesme hora Udruženja/udruge penzionera/umirovljenika općine Jajce i prigodna obraćanja održana je Svečana sjednica Općinskog vijeća Jajce.

Izražavajući zadovoljstvo što je grad Jajce jedan od gradova u BiH koji obilježava ovaj značajan datum u historiji Bosne i Hercegovine, čestitku građanima Jajca i svim Bosancima i Hercegovcima je uputio načelnik općine Jajce Edin Hozan.



Govoreći o značaju ovog praznika za Bosnu i Hercegovinu predsjedavajući Općinskog vijeća Jajce Ivo Šimunović uputio je čestitku svim građanima u povodu obilježavanja Dana državnosti BiH uz želju i namjeru da budemo pravični, vrijedni i ponosni žitelji ove države i ovog grada. Čestitke su uputili i Fikret Čančar u ime kluba vijećnika SDA BiH, Smiljka Brtan u ime kluba vijećnika koalicije Zajedno za bolje sutra Jajcu, Mujo Nešust u ime Saveza za bolju budućnost – Fahrudin Radončić, Mirko Ljubez u ime HS BiH, Mustafa Imamović u ime SDP BiH i Huso Hadžić u ime Stranke za BiH.

U okviru obilježavanja Dana državnosti BiH predstavnici boračkih organizacija, političkih partija i Općine Jajce položili su cvijeće i na Centralno spomen-obilježje šehidima i poginulim borcima Jajca.

ODRŽANA INFORMATIVNA RADIONICA ZA FINANSIRANJE BIZNISA MLADIH



U organizaciji Općine Jajce i Instituta za razvoj mladih KULT u Jajcu je održana Informativna radionica za zainteresovane korisnike Preduzetničkog fonda u Općini Jajce.

Na radionici je više riječi bilo o Javnom pozivu za finansiranje i sufinansiranje najboljih poslovnih planova udruženim sredstvima Općine Jajce i Instituta za razvoj mladih KULT namijenjenih razvoju preduzetništva i zapošljavanju mladih.

U POSJETI UDRUŽENJU 'VODOPAD LJUBAVI'

Biti roditelj djece s poteškoćama je predivan, ispunjujući osjećaj koji od vas čini u isto vrijeme i najnježniju i najsnažniju osobu na svijetu!“, poruka je ovo roditelja „Vodopada ljubavi“ iz Jajce čije udruženje je posjetio Načelnik općine Jajce Edin Hozan.

U želji da ova mala, najdivnija, najiskrenija bića učine sretnim i nama pokažu koliko mnogo ljubavi mogu pružiti ova djeca, roditelji, prijatelji i volonteri pokrenuli su prošle godine inicijativu za ponovno okupljanje unutar udruženja koje će pomoći djeci s poteškoćama u razvoju u odrastanju. U martu ove godine formirano je udruženje „Vodopad ljubavi“, a Općina Jajce, privredni subjekti, javne ustanove, građani i ljudi dobre volje pružili su nesebičnu podršku u formiranju Udruženja.

U želji da im pokažemo da nisu sami i da u radu Udruženja imaju podršku Općine Jajce „Vodopad ljubavi“ posjetio je Načelnik Općine Jajce Edin Hozan i razgovarao sa roditeljima djece koja imaju određene poteškoće u razvoju, a potom se pridružio radu radionice i dao doprinos u izradi novogodišnjeg nakita. Svakako, mališani su bili oduševljeni slatkim poklonima koji su stigli iz Općine Jajce.

Načelnik Hozan obećao je podršku Udruženju i u narednom periodu, u okviru mogućnosti, ali i nadležnosti Općine Jajce. Također, ponudio je roditeljima i Udruženju pomoć pri razgovorima i kontaktima sa nadležnim kantonalnim institucijama kako bi se poboljšali i osigurali uslovi pod kojima ova djeca mogu ići u školu, imati stručnu medicinsku i pedagošku pomoć. Općina Jajce podržala je projekat „Našoj djeci - radionica za djecu i mlade s poteškoćama u razvoju“ koji je implementiralo Udruženje „Vodopad ljubavi“, te pomogla u sanaciji grijanja u prostorijama Udruženja.



PREVENCIJA I ZAŠTITA ŽRTAVA NASILJA U PORODICI



U Jajcu je, u organizaciji Centra za socijalni rad Jajce, potpisan revidirani Protokol o međusobnoj saradnji u radu na prevenciji i zaštiti žrtava nasilja u obitelji/porodici za općinu Jajce, čime se općina Jajce svrstala u vrh općina koje su donijele ovakav Protokol. Potpisnici istog su institucije koje u svom djelovanju imaju najveće ingerencije za brigu i rad na prevenciji i zaštiti žrtava nasilja u porodici.

Ova ozbiljna problematika s kojom se suočavamo u zajednici vrlo često, zbog straha i stida žrtava nasilja ostaje ne prijavljena. Zato i ovim Protokolom se želi pomoći žrtvama ali i spriječiti potencijalno nasilje u porodici kroz edukaciju i razgovore sa djecom, mladima i odraslima. Protokol su potpisali: Općina Jajce, Općinski sud Jajce, Policijska uprava Jajce, Policijska stanica Jajce, JZU Dom zdravlja Jajce, Centar za socijalni rad Jajce i srednje i osnovne škole s područja Jajca. Svečanosti potpisivanja Protokola prisustvovao je i Zlatan Hrnjić predstavnik Gender Centra F BiH.

S PJESMOM U SUSRET BLAGDANIMA




Prigodnom priredbom prvi su u susret Božićnim i Novogodišnjim blagdanima krenuli mališani Dječijeg vrtića „Bare“. Pjesmom i igrom zajedno su obilježili dolazak blagdana i radovali se Djeda Mrazu i novogodišnjim darovima. Iskrena mala bića sa veelikim srcem poželjela su više ljubavi, pravde, poštovanja, radosti, osmijeha, sreće i pjesme. Uz dječicu radovali su se i brojni roditelji. Čestitke djeci i tetama u vrtiću uputio je i Načelnik Općine Jajce Edin Hozan sa željama da nam

naredna, 2019. godine bude baš onakva kakvu su poželjla dječica kroz svoje recitacije, igrokaze i pjesmu. „Učinimo svi zajedno da nam ova dječica odrastaju u sretnijem i boljem okruženju“, istakao je Načelnik Hozan.

Direktorica Dječijeg vrtića „Bare“ Brankica Jakešević zahvalila se Općini Jajce na podršci ovoj predškolskoj vaspitno-obrazovnoj ustanovi, ali i svim roditeljima koji su im ukazali povjerenje. Paketiće od Djeda Mraza primilo je 107 mališana, polaznika ovog Jajačkog vrtića.



BOŽIĆNA ČESTITKA NAČELNIKA OPĆINE JAJCE EDINA HOZANA



„Pred nama su božićni blagdani. Tim povodom, s velikom radošću, svim građanima Jajca katoličke vjeroispovijesti upućujem iskrene čestitke.

Dragi sugrađani želim da radost ovog velikog blagdana podijelite s vama dragim ljudima.

Neka vam je radostani čestit Božić“.

POSJETE U POVODU BOŽIĆA



U povodu Božićnih blagdana Načelnik Općine Jajce Edin Hozan i predsjedavajući Općinskog vijeća Jajce Ivo Šimunović posjetili su naselja Zgone, Mile, Bisticu i gradsko područje i tom prilikom porodicama koje se nalaze u teškom materijalnom stanju uz čestitku za sretan Božić uručili skromne novčane poklone.

Riječ je uglavnom o starim i bolesnim građanima Jajca, onima kojima će ovaj novčani dar bar malo uljepšati blagdansko slavlje.

TRADICIONALNI BOŽIĆNI KONCERT U JAJCU



Hrvatsko kulturno društvo „Napredak“ Podružnica Jajce i ove godine bilo je domaćin tradicionalnog Božićnog koncerta održanog u Domu kulture u Jajcu.

Gosti koncerta bili su Antonio Tkalec i Agneza Levančić, a uz gosta nastupili su i Napretkov zbor Nikola Šop, Veliki crkveni zbor i ženska vokalna skupina Fra Antun Knežević.

Slavlje Božića se nastavilo i nakon koncerta na Božićnom sajmu upriličenom na platou ispred Doma kulture.

U NOVU 2019. GODINU SA NAŠIM MALIŠANIMA



Pod pokroviteljstvom Općine Jajce i u organizaciji Centra za obrazovanje i druženje Jajce i 2018. godinu ispratili smo sa Jajčkim mališanima, jer najveća radost je osmijeh na licima najmlađih.

Naime, u želji da najmlađi stanovnici Jajca sa osmijehom isprate staru i dočekaju Novu godinu Općina Jajce i ove godine podržala je inicijativu Centra za obrazovanje i druženje Jajce i pridružila se organizovanju dočeka Nove godine za najmlađe.

Veeeeelika fešta dočeka Nove 2019. godine upriličena je na platou ispred Doma culture, a novogodišnje odbrojavanje Dječije Nove godine odpočelo je tačno u podne posljednjeg decembarskog dana 2018. godine.

Uz mnoštvo muzike, kreativne radionice, slatke paketiće i uz Djeda Mraza ispratili smo zajedno staru i dočekali Novu 2019. godinu. Mame, tate, bake, nane, djedovi, tetke, Jajčani zajedno sa našim mališanima dočekali su 2019. godinu.

Draga djeco želimo vam sretno djetinjstvo, mnogo radosti, osmijeha i puno petica u Novoj godini.

SRETNA NOVA 2019. GODINA

Dragi građani Jajca, upućujem vam iskrene čestitke s najljepšim željama da nova 2019. bude godina uspjeha i dobrih djela. Neka vam je sretna i berićetna Nova 2019. godina!

Načelnik Općine Jajce Edin Hozan

GRADOVI PARTNERI

PIACENZA - Italija <http://www.comune.piacenza.it/>

ALAÇATI – Turska

HALLSBERG – Švedska <http://www.hallsberg.se/>

OTTENSHEIM – Austrija <http://www.ottensheim.ooe.gv.at/system/web/default.aspx>

VIROVITICA – Hrvatska <http://www.virovitica.hr/>

ZENICA – BiH <http://www.zenica.ba/>

TOMISLAVGRAD BiH - <http://www.tomislavgrad.gov.ba>

SZEKSZARD - Mađarska - <http://szekszard.hu/>

KUTNÁ HORA - Češka - <http://www.kutnahora.cz/>

BILTEN OPĆINE JAJCE

Općina Jajce u saradnji s nezavisnim portalom Jajce Online priprema mjesečni Informativni bilten Općine Jajce koji ćete u elektronskoj formi moći prelistati svaki mjesec.

U Biltenu će biti sumirane mjesečne aktivnosti, tekstovi i fotografije koje ste možda preskočili pročitati, a zaslužuju Vašu pažnju.

Također, u Biltenu ćemo najaviti i događaje za naredni mjesec. Pred vama je četrnaesto izdanje Informativnog biltena Općine Jajce.



Decembar 2018.